

23/10/1997

Ramai yakin ekonomi negara

LONDON, Rabu - Malaysia menerima banyak sokongan daripada negara luar terutama Asia dan Eropah yang menyatakan keyakinan mereka terhadap negara, walaupun dilanda krisis mata wang sekarang.

Menteri Luar, Datuk Seri Abdullah Ahmad Badawi, berkata ramai antara mereka yakin apa yang berlaku di Malaysia sekarang bersifat sementara dan pulih tidak lama lagi.

Katanya, rekod cemerlang Malaysia terutama dalam ekonomi selama ini terus menyakinkan mereka terhadap negara.

"Dalam pertemuan dengan pemimpin dan Ahli Parlimen asing, mereka menyatakan keyakinan terhadap Malaysia.

"Kecemerlang kita selama ini sudah terbukti.

"Mereka berkata, apa yang berlaku sekarang bukan kesalahan kita, ia adalah kesan buruk daripada pihak tertentu yang menjalankan kegiatan spekulasi pasaran saham dan mata wang.

"Mereka sedar kita menjadi mangsa golongan itu," katanya pada Dialog London: Perkongsian Malaysia - Britain di sini, semalam.

Abdullah mewakili Perdana Menteri, Datuk Seri Dr Mahathir Mohamad yang sepatutnya menyampaikan ucapan di dialog sehari itu.

Beliau berkata, Malaysia akan terus memainkan peranan aktif dalam Komanwel.

Menurutnya, Malaysia tidak menyifatkan Komanwel pertubuhan yang perlu dibelakangkan.

"Komanwel penting bagi Malaysia dan kita terus memainkan peranan aktif untuk menyuarakan pandangan dalam Komanwel," katanya.

(END)